

ESDRAS

Jawen unanmati janchaki

Israelin enabu chakabububiaken jatun bakebu inun jatun bababuwen nuikin jau jatun mai pakea anu ana chintununbadinunbun Jeremías yuimakin Jehován jatu yubanidan, ma Babilonia anu yuda ichapa jatu iyunibu badi ichapa jaska Israelin enabu jiwekubainaibu jatukidi ichapa nuku yuiama ini Diosun jancha yuixunika Esdrasin eskadabes keneniki.

Na una Esdras anu Israelin enabu ana jatun mae anu chintuin taebidanibukiaki. Ana Jerusalén anu beimaxun Jehová kenwanti inun jawen jemaintin bena wakin taewanibukidi tapintiki. Na una kenedan, ja 450 año Cristo judiamatian kenenikiaki.

Jawen yunuti jancha Ciro chaninikiaki, na janchadan

(2 Cr 36.22-23)

1 ¹Persia nawa xanen ibujaida Ciron jatu xanen ibuxuni taekainkin año bestichai yunukin taewabainkin jaska Diosun jancha yuixunika Jeremías Diosun yuimani keska jau Ciron axanun Diosun jawen shinan unanmaiwen taexun xanen ibujaida Ciron jawen yunuti jancha jau dasibibun ninkanunbun janchawen jatu yuitan kenedi jatu buma akeakekin Ciron jatu yuikin: ²“Eadan, Persia nawa xanen ibujaida Ciro eska matuki chanikin en matu yui ai ea ninkakanwen. Nawa xukuabu tibi mai jidabi anua xanen ibubu en jatu yunukubainxanun Jehová mekenika Dios nai anu jiweatun ea katukin kushipa waimaki. Ea jaska watan Judán enabun mai pakea anu Jerusalén anu jawen kenwanti jiwe wanibu en jatu ana amaxanun Jehován ea yununiki. ³Jaskaken man tsuabuda Jehová Diosun enabudan, jau Diosun matu medabewakubainxanunwen. Tsuada man Judán mai pakea anu jiwea junidan, Jerusalén anu butankanwen. Ja Jerusalén anudan, janu Israelin enabu mekenika Dios Jehová jiweaki. Jadixun jawen kenwanti jiwe bena jawendua waxuni budixankanwen. ⁴Tsuabuda nenu benibu inun, jawen bakebu jiwewuabu inun, mae betsa tibi jiweabu jatun mae jenebaini Jerusalén anu ana

chintunbain jatu medabewaibun man ja dapi jiwebaunabundi matun plata pei jexe inun, oro pei jexe inun, jawada mabu betsa betsapa inun, inabu jau jatu inankubainxanunbunwen. Ja dikabi Jerusalén anuxun mekenika Dios kenwanti jiwe jawendua waibu jatun inankuin yaushiamo jau jatu inankubainxanunbunwen”, jatu wa

Jerusalén anu Israelin enabu ana chintunbainibukiaki, na janchadan

⁵Jerusalén anu buxun Jehová kenwanti jiwe jau ana benawai bununbun Diosun jatu shinan betsa wamakin benimawakubainaya kanun ika shinan chankain Judán enabu xanen ibu ichapa jawenabuya inun, Benjamínen enabu xanen ibu ichapa jawenabuyadi inun, jawenabu Diosbe janchaxunikabu inun, Levín enabu xanen ibu ichapa jawenabuyadi bunun, iwanan, dasibibu jiwebaunabun jatun mabu pewakubainaibun ⁶janua jabu jatu dapi Babilonia anu nawabu jiwebaunabu jabu dayai buaibu jatu medabewakatsis ikin jawa yaushiamo jatun mabu betsa betsapa inun, jatun plata pei jexe inun, jatun oro pei jexe inun, mabu pepa shadabu inun, mabu pepa kadujaida inun, jatun inabu jatu inanbidanbidanabu ⁷jawen kenwanti jiwe Jerusalén anua mane oro mabu shadabu Nabucodonosorin bexun jawen yushibubu kenwanti jiwe anu aduni jau buxun jatu inanunbun jawen tsumabu Persia nawa xanen ibujaida Ciron jatu yunua ma buxuanbu ⁸Jerusalén anu jau ana butanxanunbun Ciron jawen pei mekenika Mitrídates yunua chipu jatun jawen kenwanti mabu tanakin unaki kenekin keyuxun Judán enabun mai pakea anu jiweabu yunumis xanen ibu Sesbasar inanikiaki. ⁹Jaska Mitrídatesin jati mabu unaki kenekin keyuni matu yuinun ninkakanwen. 30 oro mane kenchá inun, 1,000 plata mane kenchá inun, 29 nupe inun, ¹⁰30 oro mane shika inun, 410 plata mane shika pepa bexmas shadabu inun, ana 1,000 jawen mabu betsa shadabu ichapajaidadan, ¹¹oro mane mabu inun plata mane mabu tanakin keyuabudan, 5,400 inikiaki. Yudabu Babilonia anu jatu iwenibu inun jawenabuya jatu jenebainkin jatube chintunkainkin Sesbasarin Jerusalén anu ja kenwanti mabu dasibi bunikiaki.

Jerusalén anuxun Jehová kenwankin ana taewabainibukiaki, na janchadan

3 ¹Judán enabun mai pakea anu ma jikiabu jatun mae tibi jatun jiwe anu maniabu año tanakubainaibun uxe 7 taeaya Jerusalén anu yuda dasibibu ichabu ²jaska Diosun tsuma Moisin yununi Jehová kenwankin jakixun inabu nami kuakin keyuxunkubainti jawenabu Josadacin juni bake Josué inun, jawen betsabu jawenabu Diosbe janchaxunikabu inun, Salatielin juni bake Zorobabel jawenabubetan dasibi jabun Israelin

enabu mekenika Dios kenwanti chi tapu wakin taewakin ³nawa betsabu jatunabuma jiwebaunabuki datekin Salomónen jatu yunua anibu keska wakin chi tapu wakin pejaida washinxun penama tibi inun badi kaya tibi ja chi tapu anuxun inabu nami jidabi menu keyuxunkin Jehová kenwankubainaibun ⁴jaska Moisin yunukin kenení keska wakin ni mebi mextetan utati jiwe watan jadi uxakin Jehová kenwain ⁷xaba besiaibun jaska Moisin yusini chibankin xaba tibi jati inabu ichawaxun Jehová kenwankin jawenabu Diosbe janchaxunikabun jidabi menukin keyukubainkin ⁵ja dikabi xaba tibi inun, uxe bena nia tibi inun, besiti medibi tibi Jehová kenwantitian jatun inabu jidabi menukin keyukubainaibun januxun betsabun jatun shinan pewanun ixun Jehová kenwankin inankuinkin jatun chaxuwan tesenxun daxpexun jawen puku xeni bia jawen Diosbe janchaxunikan chi tapu anuxun kuakin keyuxuna jawen nami pichanxun ma jua jawenabubetan jawen kenwanti nami pikubainaibun ⁶Jehová kenwanti jiwe adiabumabia xaba ja dukun uxe ⁷tian Jehová kenwankin xaba tibi inabu jidabi menukin keyukubainkin taewanibukiaki. ⁷Jaska Persia nawa xanen ibujaida Ciron jawen yunuti una jatu inainmawen taexun jau Jehová kenwanti jiwe wanunbun Líbano mati anuxun kuxa dedaxun senkekin ichapawaxun ja ji kekukin chaipa waxun ianenwanwen bukin Jope anu keti axun jene anua mapemakin ianenwan kexa jau manchinkubainunbun maewan dabe Tiro inun Sidón anu jiweabun yubakatan piti inun nuxuti inun piti xeni jawa yaushiana jatu inankubainkin jabu mishki dayanikabu inun ji mastanikabu dayamakin peiwen jatu pakakubainaibun

**Jehová kenwanti jiwe Templo bena wakin
taewanibukiaki, na janchadan**

⁸Jerusalén anu jikimabu año bestichai inun uxe dabe kaya Salatielin juni bake Zorobabel inun Josadacin juni bake Josué jawenabu Diosbe janchaxunikabu inun, Israelin juni bake Levín enabun jawen jaibuabu inun, Babilonia anu jatu iyunibu ma jabube chintunbidanimabubetan ana Dios kenwanti jiwe Templo bena wakin taewakin jau jabu dayakubainxanunbun Levín enabu junibu ²⁰año binuabu katuxun yununikabun jatu yunuabu ⁹Dios kenwanti jiwe bena wai dayakubainaibu jau jabun jatu yunukubainunbun Josué jawen juni bakebuya inun, jawen betsabu inun, Judán enabu Cadmiel inun, jawen juni bakebu inun, Levín enabu Henadadin juni bakebu inun, jawen betsabu inun, jawenabu betsabu jatibu jabus xukutan daya jatu yunukubainibukiaki.

¹⁰Jehová kenwanti jiwe jaki tsamabaunti mishki dayanikabun ma janakin keyuaibun jaska Israelin enabu xanen ibujaida Davidin jatu yununi keska chibankin jawenabu Diosbe janchaxunikabun jawen

tadi jawendua jaya besiti sawetan jawen chan ati trompeta tsumatan jatu kexea mapuabu Levín enabu Asafin enabun mane bronce tudu tsakama tsakama ati dabe jawen Jehová kenwanti tsuma mapuabun ¹¹betsabun kenwain kantaibun betsabundi kemakin: “Jehová pepaki. Israelin enabu bechipai nuimis jawen nui keyutimajaidaki. Pepawakin benimawanankanwen”, ikubainaibun Jehová kenwanti jiwe bena wakin ma taewaibuwen taea yudan kaian benima chakayamai sai sai ikin Jehová kenwankubainaibun ¹²Jehová kenwanti jiwe bena waibu uin jawenabu Diosbe janchaxunikabu inun Levín enabu inun jawenabu yunui xanen ibu ichapabu natian ma anibubia Jehová kenwanti jiwe Templo Salomónen ani jabun uinibuwen taea benima chakayamai kaxai bis bis ikubainaibun jabiastiandi betsabu ichapabudi benimajaidai sai sai idiakubainaibun ¹³benimai sai sai ikaibu inun kaxai bis bis ikaibu tsua jatun jui unantiduma chajaidaxun ninkanibukiaki, itimaskakin jatun jui kainmaibudan.

**Jerusalén anu Dios kenwanti jiwe bena waibu jatu
itimaskawaibu Daríon jatu nemanikiaki, na janchadan**

[Nawa Éufrates dapi jiwebaunabu Israelin enabuki jatuki sinatakin jatu nemakin Persia nawa xanen ibujaida Daríon jau jatu nemanun jatun jancha unaki kenexun bumabu bixun uinkin yuitan]

6 ¹Babilonia anuxun janu una mekekin adumisbu anua jau ja una Judán enabukidi Ciron jatukidi kenexun adumani jau benakin bechixununbun Persia nawa xanen ibujaida Daríon jawen tsumabu yunua ²janu una adumisbu tibi anua benabaunkin mai pakea betsa jawen kena Media anu mae betsa Ecbatana anu xanen ibujaidatun jiwe jawenduajaida anuxun Ciron Jerusalén Templokidi kenení una atimas bechinibukiaki, eska jawen jancha jatukidi kenenidan:

³“Xanen ibui taeima año bestichai kakín xanen ibujaida Ciron eska jawen yunuti jancha jatu kenemakin:

‘Jerusalén anu jawen Dios kenwanti jiwekidi matu yununun ninkakanwen. Januxun Dios kenwankin inabu jidabi menukin jau keyukubainxanunbun jaki tsamabaunti waxun jawen kenwanti jiwe jau ana anunbunwen, jawen keyatapa 27 metro inun jawen jaxpa 27 metrodidan. ⁴Ja dikabi mishki ewapa ichapa datsakin kedan wankin pewaxun chichibainkin keyutan ja mamaki ana chichibainkin keyudiatan ana ja kachu ja mamaki ana chichibainkin keyudiatan ji tuax sapa bena waxankanwen. Xanen ibujaidatun pei adukin mekemistun jatu pakakubainxanikiki. ⁵Oro mane inun plata mane jawen kenwanti mabu wanibu Dios kenwanti jiwe Jerusalén

anua ichawabainkin Babilonia anu Nabucodonosorin beni jau jatu ana inaxanunbunwen. Bikin ichawakin keyuxun Jerusalén anu buxun janu Dios kenwanti jiwe waibu anu ja medan tsaunkin jau manchinxanunbunwen' ", anikiaki.

⁶Jaska keneni bechixunabu uintan Jene Éufrates kexa betsaudi badi kaikidi mai pakea yununika jawen kena Tatenai inun jabianudi xanen ibu bexmas Setar-boznai inun jabe dayamisbu jatu yunukin Persia xanen ibujaida Daríon eska jancha jatu kenematan jatu anu yunukin:

"Matudan, Jerusalén jenebidani kaindibidankanwen. ⁷Januxun jau jatun Dios kenwanti jiwe bena waimabu jau menenunbun Judán enabu xanen ibu bexmas inun jatun yununika betsa betsapabu jatu ana nemama jatu jenetan jatu yunudibidankanwen, jau keyuxanunbunan. ⁸Ana jatu nemakin bexteyamakanwen. Jau jatun Dios kenwanti jiwe jau menexanunbun jaska Judán enabu yununikabu man medabewaxanun en matu yunuaii. Jene Éufrates badi kaikidi mai pakea anu jikikin ea pei pakakubainmisbu xanenibun pei bikin mekekubainmistun medabewakin binumama pei jawaida jatu pakakubainxankanwen, jau ja dayaibu jatun daya jeneyamanunbunan. ⁹Ja inun, jaska Dios nai anuatun bechipaimis jawen kenwanti inabu jidabi pitiyabi menuxunkin keyukin jau Dios kenwankubainunbun ina awa inun, chaxuwan inun, chaxuwan bake inun, xekiwan trigo inun, sau inun, uva vino inun, piti xeni jati matu yukaibu xaba tibi Jerusalén anu jawenabu Diosbe janchaxunikabu jatu inankubainxankanwen, jawa jeneamadan. ¹⁰Man jatu inankubaina Dios jaska waxunkin en xanen ibujaida jiweakidi inun en juni bakebu jiweakidi jau Dios jabun ea yukaxunkubainunbunwen.

¹¹Tsuanda en yunuti jancha danankin ninkama danainbudan, jawen jiwe jawen teweti betsa pekaxun nichintan debu kenutan jawen yuda ja mamaki janakin jawen puku nashtu anu timabain pesakin keunxankanwen. Unanxubida isin tenekunkaini mawaya jawen jiwe pekakin keyuxun chakabuwakin mese waxankanwen. Jaska dasibi en matu yunuaii. ¹²Jerusalén anu Jehová kenwanti jiwe Templo janu jawen kena ipakexanai katuni akaibudan, xanen ibu betsan chakabuwakasmakin nawa betsabu pubenkin chakabuwakin jatu bika tenemaibu Diosun jatu kupikin jau jatu yamawaxanunwen. Ea Daríon na jancha eska en matu yunuaidan, kaneama axunkin menejaidaxunxankanwen", anikiaki.

Dios kenwanti jiwe akubainkin keyunibukiaki, na janchadan

¹³Jaska Daríon jatu yunuima Jene Éufrates kexa betsaudi badi kaikidi mai pakea betsa yununika xanen ibu bexmas Tatenai inun jabianudi

xanen ibu betsa bexmas Setar-boznai inun jabe dayamisbun uintan jaska ma jatu yunuima jawa kaneama akubainkin keyunibukiaki.

¹⁴Jaska wakinan, Diosun jancha yuixunika dabe Hageo inun Idón juni bake Zacaríasin jaska bebunkidi Diosun jatu yuimaima keska chibankin jau dayakubainunbun Judán enabu dayadubu yununikabun jatu yunukubainabu Dios kenwanti Templo bena wakubainkin jaska Israelin enabu mekenika Diosun jatu yunuima inun jaska Persia nawa xanen ibujaidabu Ciro inun Darío inun Artajerjesin jatu yunukubainabu chibankin akubainabun ¹⁵Persia nawa xanen ibujaida betsa Darío jatu xanen ibuxunkunkaini xaba 3 inun, uxe Adar inun, 6 año kaitian Dios kenwanti jiwe menekin keyunibukiaki.

¹⁶Israelin enabu inun, jawenabu Diosbe janchaxunikabu inun, Israelin juni bake betsa Levín enabu inun, dasibi Babilonia anu jatu iyunibu ana chintuinmabu benimajaidakin Dios kenwanti jiwe meneshina Dios uinmai jaki besikin ¹⁷jabiatiandi 100 ina awa bake bene inun, 200 chaxuwan bene inun, 400 chaxuwan bake tesenxun Dios kenwankin jawen chi tapu anuxun inabu jidabi menukin keyuxunaibun Israelin enabu dasibibun Dioskidi chakabukubainmisbu buanan, iwanan, Israelin enabu 12 xukuabu tibi cabra bene bestichai katutan Jehová daewakin ja 12 cabra bene tesenxun chi tapukixun cabra jidabi menukin keyuaibun ¹⁸chipu jabu dayakubainxanaibu xuku wakin jawenabu Diosbe janchaxunikabu jatu paxkakin jatu yunuakeaketan januxundi Levín enabu junibu jaska Jerusalén anuxun Dios dayaxunkubainkin jaska Moisin kenei keska chibankin jau Dios duawakubainxanunbun jatu yunuakeakenibukiaki.

¹⁹Babilonia anu jatu iyunibu ana chintunbidanimaxun año bena kainyaintian xaba 14 inun uxe ja dukun ikaitian Egipto anuxun Jehován nai tsuman Egipto nawabun juni bake iyuabu jatu tenanbauni inun Israelin juni bake iyuabu tenanma jatu dunkebaini shinankin Jehová kenjaidawai benimai Pascuatian besi tushinibukiaki. ²⁰Besidiabuma jau Jehován jatu dananyamaxanun jawenabu Diosbe janchaxunikabu inun Levín enabu junibu ibubis jatun yuda ma pei keyushinabu ma jawama shinankin Babilonia anu jatu iyunibu ma chintunbidanimabu inun jawenabu Diosbe janchaxunikabu ma peshina jatubetan Pascua jawen shinanmati chaxuwan bake bene midimajaida tesenxun jatu menuxuntan jatubetan pikatsi ²¹Babilonia anua dasibi Israelin enabu chintunbidanibubetan pinibukiaki. Ja inun, nawa betsa betsapa jatun mae anuxun jatun beya chakabu atimapa amisbu jenetan ana akama Israelin enabun mekenika Dios Jehová kenwankin taewakin jatube dasitan jawen kenwanti nami jatubetan pikin keyudianibukiaki.

²²Israelin enabu mekenika Dios kenwanti Templo jau bena wanunbun Persia nawa xanen ibujaidatun jatu bechipaikin jatu medabewakubainimawen taea Judán enabu benimajaidakin 7 xaba

binui ana ja kachu besikin misi xaxawatiuma ashinxun benimakin pikubainibukiaki.

Jerusalén anu Esdras jawenabube jikinikiaki, na janchadan

7 ¹Chipu badi ichapa kaya Persia nawa xanen ibujaida bena jawen kena Artajerjesin jatu yunukubainaya jawenabu Diosbe janchaxunika jawen kena Esdras Persia anu jiwea jawenabu jati inikiaki. Esdrasin epadan, Seraías inikiaki. Seraíasin epadan, Azarías inikiaki. Azaríasin epadan, Hilquías inikiaki. ²Hilquíasin epadan, Salum inikiaki. Salumnen epadan, Sadoc inikiaki. Sadocin epadan, Ahitub inikiaki. ³Ahitubin epadan, Amarías inikiaki. Amaríasin epadan, Azarías inikiaki. Azaríasin epadan, Meraiot inikiaki. ⁴Meraiotin epadan, Zeraías inikiaki. Zeraíasin epadan, Uzí inikiaki. Uzín epadan, Buquí inikiaki. ⁵Buquín epadan, Abisúa inikiaki. Abisúan epadan, Finees inikiaki. Fineesin epadan, Eleazar inikiaki. Eleazarin epadan, Aarón ja dukun jawenabu Diosbe janchaxunika ipaunikiaki.

⁶⁻⁷Israelin enabu mekenika Jehová Diosun jawen yunuti jancha inun jawen nemati jancha Moisés yuia Moisin kene ni ibubis tapinjaidanixun Esdrasin jatu yusinkubainmiswen taexun Esdras Jehován medabewai uinkubainaiwen taexun xanen ibujaida Artajerjes anu kaxun Esdras jaskakatsis ikin yuka: “Peki”, akimawen taea xanen ibujaida Artajerjesin jatu yunui 7 año kaya Babilonia anua Jerusalén anu chintuin Esdras jati jawenabuya junikiaki, jatidi Diosbe jawenabu janchaxunikabu inun, Levín enabu inun, kantamisbu inun, beputi mekenikabu inun, Dios kenwanti jiwe dayadubu Esdrasbe buidan. ⁸⁻⁹Artajerjesin jatu yunukubaini ma 7 año kaya ja xaba ja dukun inun, uxe ja dukun ikaitian Babilonia anua unanuma taxni taebidani main bukubainaiun Jehován jatu duawakin medabewaya xaba ja dukun inun uxe 5tian Jerusalén anu jikinibukiaki. ¹⁰Jaska Jehován yununi jawa betsa wama mestenwankatsi ikin uinkubainkin jawen yunuti jancha inun jawen nemati jancha jawenabu yusinkin jatu chibanmaxanun, iwanan, Esdrasin shinanikiaki.

¹¹Israelin enabu jawenabu jau jatu chibanmaxanun, iwanan, jawen yunuti inun jawen nemati jancha Jehován yusini unanjaidai jawenabu Diosbe janchaxunika Esdras yusinika inankatsi ikin eska jancha xanen ibujaida Artajerjesin jatu kenemaxun Esdras inani jabias jancha juni betsan ana kene ni uinkanwen:

¹²“En ea Artajerjes xanen ibujaidatun xanen ibubu ichapa en jatu yunukubainai Dios nai anuatun yunuti jancha unanjaidai jawenabu Diosbe janchaxunika Esdras jau unanuma kakunkainxanun, iwanan, en jakidi matu shinanmai.

¹³Janu en mai pakea anua en jatu yunubaunai anu Israelin enabu dasibi jiwebaunabu Jerusalén anu mibe bukatsi ikaibu butidubuki.

Israelin enabu Diosbe janchaxunikabu inun Levín enabudi budiatiidubuki. ¹⁴Diosun yusini jancha min jaya chibankin Judán enabun mai pakea anu inun Jerusalén anu jaskada jiwebaunabu uinkin min tapinkubaunxanun ea xanen ibujaida inun en 7 unanepan ea medabewamisbun nun mia yunuaii. ¹⁵Israelin enabun mekenika Dios Jerusalén anu jiwea pe shinankin jawa yaushياما plata pei jexe inun oro pei jexe nun mia inankuiain butanwen. ¹⁶Ja dikabi Babilonia mae jatiubumanu jiwebaunabun pei mia inainbu bikin ichawatan Jerusalén anu Dios kenwanti jiwe waibu jau jawen jatu medabewakubainxanunbun pe shinankin yaushياما minabu yudan kaian inun minabu Diosbe janchaxunikabun pei inankuindiaibu budiatanwen. ¹⁷Jerusalén anu matun mekenika Dios kenwanti jiwe anu jawen chi tapu anuxun jau menukin keyuxunkubainxanunbun ina awa bake inun, chaxuwan bene inun, chaxuwan bake inun, jabuyabi menuki xekiwan trigo inun, uva vino na peiwen jati bikubainxanwen, jawa mina wamadan. ¹⁸Diosun jaska bechipaikin mia shinanmai chibankin oro pei jexe inun plata pei jexe texewen jaska pe shinankin mia inun mibe dayamisbubetan min jaskada wakubaintiduki. ¹⁹Ja inun, min mekenika Dios kenwanti jiwe anuxun jawen kenwanti mabu nenu benibu mia inanshinabu buxun Jerusalén mekenika Dios bebunxun ana inankin tsaunbaunxanwen. ²⁰Min mekenika Dios kenwanti Templo anu jawada mabu betsa jayama binun, iwanan, en pei mekenikabun aduti jiwe anua jawada bikatsi ikin ja pei min bitiduki.

²¹Jaska inun, man enabudan, ea en xanen ibujaida Artajerjesin Jene Éufrates badi kaikidi anua man pei mekenikabu dasibi en matu yunuaii. Dios nai anuatun yunuti jancha unanjaidai Esdras jawenabu Diosbe janchaxunmistun jawada dasibi matu yukai jawaida inanxankanwen. ²²Jatidan, 3,300 kilo plata mane inun, 22,000 litro xekiwan trigo inun, 2,200 litro uva vino inun, 2,200 litro piti xeni jati jawa binumama inankin jatida sau bikatsis ikin matu yukai jawa tanama inanxankanwen.

²³Jaska Dios nai anuatun jawen jiwe anu jayakatsi matu yukai sinatamama jawaida inankubainxankanwen, jau ea inun en juni bakebu inun jatixun nukun mai pakea en matu yunuai ninkaiibu anu jawen kupiti jau nuku yunuyamaxanunan. ²⁴Jerusalén anu Dios kenwanti jiwe anu dayamisbu inun, Diosbe jawenabu janchaxunikabu inun, Levín enabu inun, kenwain kantamisbu inun, jawen jemaintin beputi mekemisbu inun, medabewanikabu inun, dayadubu impuesto man jatu yukayamakubainxanunbun en matu nemaii. Na yunuti jancha ninkakin man en mekenikabunan, jaskaki ninkaidakanwen.

²⁵Jamen miadan, Esdrasiin, ea ninkawe. Jaska min mekenika Diosun mia tapinmakin yusinmis chibankin Jene Éufrates badi kaikidi jene kexa betsaudi jiweabu min mekenika Diosun jancha unainbu inun unanbuma jatu yusinkubainwen. Ja inun, jau jabun mae mekekin yunununbun jatun yununika kushipabu katukin jatun xanen ibu bexmasbu katukin jatu yunuxanwen, jau jabun jawa kaneama jatu pe mekekin yunukubainxanunbunan. ²⁶Min mekenika Diosun yunuti jancha inun jawen nemati jancha inun ea Persia nawa xanen ibujaidatun en yunuti jancha inun en nemati jancha danankin chibanbuma jawaida jau jatu kupikubainxanunbunwen, tenainmenkain, ana mae betsa chajaida anu nichinmenkain, pei ichapa biankin kupimenkain, bichiti jiwe anu bichimenkain. Jatiski, en janchadan”,
 atan jaska Artajerjesin kenemanikiaki.

Esdras Dios kenwain jabe janchanikiaki, na janchadan

²⁷Eskawen taexun Esdrasin Dios kenwankin yuikin: “Nukun xenipabun mekenika Dios Jehovahán, min pepajaidaki. Jerusalén anu min kenwanti jiwe ana atimapa uinkatsi ikama jau pewanunbun Persia nawa xanen ibujaidatun shinan min pe shinanma jatu yunua akimabuki. ²⁸Jabiaskadi wakin ea shinan chankanwankin jatu bebunxun jatun xanen ibujaida inun, jawen unanepabun medabewamisbu inun, jawen xanen ibu bexmasbu jatuwen ea nuimakin min jatu ea bechipaimaimaki. Jaskawen taea Jerusalén anu Israelin enabu xanen ibubu unanepabu jau ebe chintununbun jatu ichawatan en jatube chintuinmaki”, akin Esdras Diosbe janchakin yuiniaki.
